

Аллоҳ буюрганидек ака-ука бўлиб яшайлик!



17:00 / 24.02.2022 3381

Нега олимларни ёмон кўрасизлар?!

Нега илм аҳли бўлган кишиларни турли сўзлар билан ҳақорат қиласизлар?!

Нега ёқтирмаган одамингизга нисбатан турли камситувчи сўзларни ишлатасизлар?!

Нега ҳақорат қилувчилар тўдаси бўлиб йиғилиб олгансизлар?!

Нега тилидан ва қўлидан бошқаларга озор бермайдиган мусулмон эмассизлар?!

Фейсбук, телеграмда урушиб, ҳақорат қилиб, устидан истехзо қилиб, кейин телефонни ўчириб, масжидга кириб, намоз ўқиб, намоздан сўнг «Эй Роббим, турли жойларда қийналаётган диндош биродарларимизга нусрат

бергин! Муслмонларни азиз қилгин! Муслмонларнинг қалбларини улфат қилгин!» деб дуо қиласизлар-да, кейин масжиддан чиқиб, интернетни ёқиб, яна ҳақорат, инсонларни ер билан битта қилиш ишини давом эттирасизлар-а?!

Сизлар чиндан ҳам муслмонларнинг қалблари улфат бўлишини, азиз бўлишларини истайсизларми?!

Нега одамларнинг хатосидан қувониб, уни омма ўртасига олиб чиқиб, муҳокама қилиб, роҳатланасизлар?!

Сизлар диндош биродарингизнинг ислоҳини, тузалишини, унга чинакам насиҳат қилишни хоҳлайсизларми ёки шарманда бўлиб, юзи қаро бўлишини, ҳеч тузалмаслигини истайсизларми?!

Сизларга жамият, инсонларнинг салоҳиятли бўлиши керакми ёки интернетда кунига битта-иккита муҳим мавзу бўлса, шуни кавлаштириб вақт ўтказсанглар бўлдимми?!

Асл мақсадингларни белгилаб олганмисизлар?

Баъзиларингиз имом номи борки, ёқтирмайсизлар. Худди масжидда ишласа, ўша одам сизларнинг наздингизда хоин, сарой мулласи, давлат одами, сотқин, шундайми?!

Сизларга ким ёқади ўзи?!

Алкашми, фоҳишами, мунофиқми, иккиюзламачими, фирибгарми, ким?!

Аллоҳга ҳамд бўлсинки, ҳаммамиз муслмонмиз!

Муслмон бўла туриб, муслмонларга амру маъруф, наҳйи мункар қиладиган, намозини вақтида ўқийдиган, тунги клубда эмас, масжидда хизмат қиладиган инсонларни нега ёқтирмайсизлар?!

Абу Барза ал-Асламий розияллоҳу анҳудан ривоят қилинади: «Расулуллоҳ соллаллоҳу алайҳи васаллам: «Эй тили билан иймон келтириб қалбига иймон кирмаганлар жамоаси! Муслмонларни ғийбат қилманглар ва уларнинг айбларини ахтарманглар! Ким уларнинг айбини ахтарса, Аллоҳнинг Ўзи унинг айбларини ахтаради. Аллоҳ кимнинг айбларини ахтарса, уни уйининг ичида шарманда қилади», дедилар».

Абу Довуд ва Термизий ривоят қилган.

Биродарлар, агар қайсидир аҳли илмнинг хатосини, нотўғри гапирганини, динни тўлиқ етказмаётганини эшитган бўлсак, ўша устознинг олдиларига бориб, бошқаларга эшиттирмай, фақат ўзларига хатоларини одоб билан етказайлик!

Мана шунда мусулмоннинг кўзгуси бўла оламиз, шарманда қилмай насихат қилган бўламиз.

Дин душманларига нисбатан қалбимизда топилиши лозим бўлган нафратни мусулмонларга, мусулмон олимларга нисбатан ишлатмайлик!

Бир тану бир жон бўлайлик, бўлинмайлик, ахир ягона Аллоҳга иймон келтирганмиз, бир қиблага юзланамиз, бир Пайғамбаримиз соллаллоҳу алайҳи васалламга эргашамиз.

Нўъмон ибн Башир розияллоҳу анҳудан ривоят қилинади:

Расулуллоҳ соллаллоҳу алайҳи васаллам шундай дедилар: «Мўминлар ўзаро дўстликда, меҳрибонликда, меҳр-оқибатда яхлит бир танага ўхшайди. Ундаги бир аъзо хаста бўлса, қолганлари ҳам унга қўшилиб бедор бўлиб, иситмалайди».

Икки шайх ривоят қилган.

Илтимос, бир тананинг аъзоларидек бўлайлик!

Абу Ҳурайра розияллоҳу анҳудан ривоят қилинади:

Расулуллоҳ соллаллоҳу алайҳи васаллам: «Гумондан четланинглари. Чунки гумон сўзларнинг энг ёлғонидир. Бировларнинг айбларини ахтарманглари. Ва сўзларига қулоқ тутманглари, яъни жосуслик қилманглари. Бирор нарсага фақат ўзингиз эга бўлишга ошиқманг. Ҳасад қилманг. Бир-бирингизга ғазаб қилманг. Ҳамда орқа ўгириб муносабатларни бузманг. Эй Аллоҳнинг бандалари, сизларга буюрилганидек биродар бўлинглар».

Аллоҳ таоло буюрганидек ака-ука, оға-ини, биродар бўлайлик!

Аллоҳ таоло тўғри эътиқоддаги мусулмонларнинг иймонига, ақидасига тош отаётган, ақида китобларидаги матнларни нотўғри шарҳлаётган, мусулмонлар орасида фитнага сабаб бўлаётган, мазҳаббоши мужтаҳид имомларимизга, мазҳаб ичидаги мужтаҳидларимизга, уламоларимизга, Имом Мотуридий, Имом Ашъарийдек ақида имомларига сакраётган кимсаларга ҳидоят, инсоф, тавфиқ берсин ва уларни ҳам ҳаққа қайтарсин!

Аллоҳ таоло барчамизни Ўзининг ҳидоятидан айирмасин ва хотимамизни чиройли қилсин!

Ҳамма мусулмонлар бир-бирига чин маънода кўзгу, биродар бўлишини истовчи гуноҳкор, ожиз, заиф бандадир.

Интернет маълумотлари асосида Нозимжон Ҳошимжон тайёрлади.